

四庫全書

集部

欽定四庫全書

桐江續集卷十

元方回撰

村路有呼予老朝奉者

真公真相自難誣非相非公亦好諛誰忽謂予老朝奉

心知不是賸稱呼

予舊守郡階
官朝奉郎

王干三嶺

澄練平臯水屈盤青蒼松櫟擁峰巒霜晴村落全如畫

一見都忘上嶺難

戲詠昌化縣土風二首

閑衣男子荷薪樵，癭頸婦人昂髻髻。
巨石塞途饒犖确，荒村扃戶故蕭條。
水風騷屑雨非雨，溪澗複重橋復橋。
授粲割鮮何敢望，尚無漓酒與儂澆。

富有大山無廣川，積多冢樹少炊烟。
絕竒車盤嶺上石，稍闊走馬平東田。
竹筐曬穀爭晴日，瓦甕淹齏及凍天。
未信蘇湖萬頃室，數家蕎稈樹頭懸。

三貪嘆

并序

行昌化縣西道見一死蛇一死鼠久之村落頗
喧獵戶昇一死豹解縣賦三貪篇

十月蛇當蟄錦文遨道邊碎首斃農挺人蛇胡不然鼠
竊不以夜腐尸供鴟鵂白晝自掇禍人鼠宜戒旃猛豹
落檻穿割皮充席氊人中亦有豹勿恃多金錢蛇鼠喻
官吏豹以喻將焉三貪逴天誅聽此三嘆篇

村女

青荷葉傘茜裙紅隨母歸寧省外翁莫笑梳裝未京樣

兵餘猶見太平風

卷十

下營曉行二首

霜鏤馳裘耳欲冰
誰家先我已宵興
道傍籬落遮叢篠
隔火熒熒見一燈

月淡雲濃弄曉晴
草中白處路微明
垂鞭緩轡十餘里
始聽鳴雞第一聲

行於潛縣南田中

曾躡危橋入縣行
蕭然無處覓詩情
不如涉淺田南過

天目山長一抹橫

燥溪曉行

旅宿殊難穩宵征敢告勞三聲雞未動五丈月猶高險路紆羸馬寒飈穴敝袍枯林影中過恐或有梅梢

過畫龍天始明

落月猶餘彩荒村已幾過店明燈透壁石響馬升坡起早寒多嗽忘勞暗自歌老夫亦小憇霜重手頻呵

丁橋曉行

苔水無聲鏡面光
漁家孤艇泊中央
十幅生綃誰畫得
一輪斜月一蓬霜

贈地里周國祥

存衛府勲有是事
下婢子品斯何心
多少幽明不平處
煩君端試指南針

再贈周國祥言相

紛紛世上少全人
鶴睫分光照始真
李相頭顱君莫笑
神仙猶現羽禽身

小說唐相李石入嵩山遇一病鶴損足呻吟人言謂石得人血五合傳之

可愈石即欲刺血鶴謂汝亦非全人也拔一眼睫與石
自照乃驢首耳石至洛陽天津橋以鶴睫照無全人者
一賣薪翁乃全身人也石拜之
以告得血入山傳鶴愈而飛去

贈五星梅獬孫

運極螟蛉紹雀兒太平早有竇郎知市門屠販規溫飽
何足煩君子細推

晚登湧金門城望湖

烟昏日落更誰知四十流年一餉時水次梅花應獨笑
城頭老子尚能詩畫船綠幕今如夢雪鬢蒼顏只自悲

淡抹濃粧有餘態西施終是老西施

予二十一至杭條四十年

次韻酬郝潤甫

彥澤

二首

與君山澤兩臞僂浪走塵埃汨市廛老貌相逢今又別
餘生更覺不如前孰追赤制春秋筆稍悟黃庭內外篇
俯仰此心了無媿冷看舉世售梔鞭

幸君三復甫田詩髀肉空消萬里馳直與羣飛爭勇往
可能小退入深思古人未必成功易智士寧無見事遲

海闊天長一翹想搏鵬豈料竟低垂

謂南征而歿者

喜趙賓暘至次韻舟行二首

別後生涯兩更微，累糧東路是耶非。
我才疋馬荒山出，公亦輕帆下水飛。
市酤未成投轄飲，閒枰聊解爛柯圍。
會須一騁吳山目，同上嚴家九隴磯。

憶泛桐江水，真成照膽清。
熟知漁父樂，恨乏釣船輕。
身老不重少，潮平還復生。
誰能似沙鳥，興廢了無情。

題陸君

傳亨

鴈鷺圖

菰米飄香白，小肥汀鴻沙鷺狎。
晴暉太湖天接吳，松閣

莫近能言鴨畔飛

次韻賓陽令郎

璵

見示二首

盛名從昔起寒微
逆旅蕭條未必非
政可夜樓觀月落
不應曉枕歎霜飛
妙年振鬣思千里
他日干霄會百圍
通介隨時有中道
稍容衰老擅漁磯

老我泥塗久
郎君玉雪清
百年雙鬢謝
一醉萬緣輕
孰肯延枚叟
端難少賈生
脩程未可料
聊此慰詩情

湧金門城望五首

蕭條垂柳映枯荷金碧樓空水鳥過
畧剩繁華猶好在
細看冷淡奈愁何遙知堤上遊人少
漸覺城中空地多
回首太平三百載錢王納土免干戈

左看城闕右看湖輾翠蹄紅路欲蕪
君子頗聞梁上有
麗人何至水邊無他時公論誰良史
往日虛名幾腐儒
地下西施應冷笑不緣紅粉解亡吳

天迴地轉事雲輪湖葑山榛色漸陳
墜珥遺鈿如隔世
歌樓傾榭最愁人一錢物變千錢直
十戶民驚九戶貧

猶有沙河塘上路賣花聲作舊時春

曾向西湖醉寫詩衰年六十嘆飈馳一毫無補承平世
萬事俱非老死時三竺禪牕猿已化八梅吟冢鶴應悲
花穠月艷今如夢卧聽長橋笛夜吹

風入松詞萬口傳翻成餘恨寄湖烟難尋舊夢花陰地
剩放新愁雪意天戰罷閒堤眠老馬宴稀荒港泊空船
此心擬欲為僧去政恐袈裟未慣穿

趙賓陽唐師善見和湧金城望次韻五首

猶存徑菊已無荷城上霜風匹馬過
廝養前行疑巨可
徼巡側睨暗誰何感時詩客推敲苦
逃俗編氓剝落多
祇為湖山泰佳麗水犀十萬競投戈

頽城磚甃墮平湖禁籞彫殘故苑蕪
戚畹換班言肯用
邊庭入相事應無福威玉食欺孤主
詩禮金椎黨盜儒
喪亂誰憐杜陵老嬌兒短褐倒天吳

玉斧難脩舊月輪淒涼沙鳥犯鈎陳
總因燕頷多庸將
却誤蛾眉事別人一紀于今兵粗定
四民莫若士猶貧

酒壚高李能同醉老眼昏花暫覺春

主人攜妓我題詩三十年如一瞬馳尚想泊船行馬處

不殊衝雪探梅時相君已抱犧牛悔京兆空餘鵬鳥悲

誰會此懷同向秀夜鄰橫玉起孤吹

丙辰丁巳間魏公明已為丞郎所謂

同探梅雪時也尋忤丁去

國後尹京忤賈謫死嚴陵

臚唱曾叨殿上傳末班遙望御爐烟貂蟬公不施霖雨

蟣蝨臣能補漏天羞見稗官成野史懶攜草具問湖船

原闕二字燈火元宵近無復遨頭夜市穿

次韻謝曹之才見贈

良史

崦嵫冉冉迫斜暉夢斷銘功十二旂
鄰曲過從穿不借故鄉書問寄當歸
固窮敢向中途悔小隱無令始願違
萬境皆空心已死霑泥落絮肯重飛

寓樓小飲

并序

十一月十二日趙賓暘仇仁近曹之才張仲實
道士王子由會于方回之寓樓以西湖客北海
樽各賦五言一首賓暘子伯玉侍

六賢一道士邂逅及吾門藉甚西湖客慙無北海樽雪

堂副團練石鼎老軒轅歌杜詩奇絕誰能效許渾

賓賜歌大

江東
去詞

次韻仇仁近謝詩跋

羈角朋從飾悅鴈成人可更戲桐圭萬鈞致力終能舉
一字爭工未易題魯頌向來晞考父雩風元自異公西
長江破浪輸君手肯學村船逆上溪

次韻權季玉枕上偶成

邇日屢聞親藥鼎客懷沈鬱與誰論細參素問心無病
勤剔青燈眼未昏九折政思為孝子七襄未用乞天孫
察君詩味如枯淡中有無窮古意存

次韻胡正卿

長途疾足詎容休政是嘶風抹電秋小復低迴從吏隱
未應拘窘嘆官囚聲名甫逐濤江起魂夢空隨沁水流
一顧即看逢伯樂直須畫繡問刀頭

次韻仇仁近至日

浪說春迴地底陽
馳裘正怯北風涼
未來事甚雲難測
已老身無日再長
紫邏招魂千里雪
彤庭待漏五更霜
閒人幸脫拘攣外
客枕何庸早起忙

次韻仇仁近晴窗二首

澗毛足可繼晨羞
牕暗牕明日去留
古道海深磐石墜
時情風緩緩絲游
天淵有間終何恨
人我相違各不求
四顧茫然欲馬往
一寒端為效忠謀

往時渙忍玷蕃宣
處士名聞積有年
甚欲同傾彭澤酒

未能略送始興錢
細看好句無疵處
時出名言亦自然
苦海愛河爭沒溺
禪窻一榻篆茶烟

次韻仇仁近見贈

霜削風腴縕絮輕
忍能弔古上頽城
窮途我輩俱相似
老態今年轉可驚
差喜有兒勝伯道
故知無婢效康成
紫陽溪上餘茅屋
終與沙鷗不負盟

次韻張仲實見贈

久縻官務費爬梳
一旦投閒得自如
紫綬金章已高閣

青鞋布襪是安車漫郎心事詩能說散聖禪流髮未除
物我重輕中了了可能秤象待蒼舒

至日後吳山城隍廟

磴石梯飈俯去鴻湖江左右海西東冥冥烟霧已難辨
杳杳樓臺猶未窮搖翠步蓮來陌上褰紅指笋出輿中
誰知夜靜狐狸吼粉黛還如舊六宮

會張仲實宅得天字

兵甲更多難桑榆迫暮年孰能容此老猶得並諸賢空

闊瞻喬木推移嘆逝川
醉鄉春有路暫覺異寒天

喜鶴田李元暉至

江海踰千里春秋近七旬
盜兼兵塞路貧與病隨身行

李奔窮歲生芻莫故人論文
豈知許但喜酒杯親

來弔趙總

使孟奎

次韻仇仁近用韻見示五首

時驚驛走聽庭宣老朽於予孰使年
鳴玉久忘綰結佩
穿花空憶錦連錢愧非今代王摩詰
許識能詩孟浩然

野服幅巾亦堪畫丹青何必上凌烟

眼過登伽皴面羞湖山信美為誰留開通不辦多王老
下澤唯思侶少游行役自量非得已食貧能忍復焉求
餘生至此當知命壯事虛拋更老謀

久已休官卧紫陽故園稍復葺荒涼雖無厦屋千間廣
尚有書藥二尺長清賞五更花過雨珍烹十月菜經霜
客遊漫惹興亡恨早覺歸心曉夜忙

治任猶近旦中觴旅次今移日至圭惡況味逢佳節序

懶情懷怯好詩題向來守黑元知白幾輩平東復鎮西
定是仇仙知此意卜隣端欲共花溪

褒衣全覺近人輕擊柝鳴輦滿萬城士氣欲如枯草死
文聲未見蟄雷驚絳侯豈識長沙傳秦宓能非棘子成
當復夜牕抱吟膝百年長與一燈盟

別後寄趙賓暘併楊華父二首

虛翁眼暗魯翁聾聚散匆匆老病蹤近已有人傳我死
何期此地與君逢兩窮未必時流識一笑猶為造物容

自覺平生豪故在能揮萬字飲千鍾

貌顛神定楊明府聽曠思聰趙廣文此老足成三釣叟
相望各占一谿雲賓陽客邸偶胥會華父家園誰共醺
為報包山舊喬木欲來繫馬說新聞

次韻張仲實歲晚

老窮勝夭達敢惜歲時遷食玉多憂死披簑且醉眠西
湖非昔者南雪尚春前稍足陶鉗粟諸公不用憐

送高險崖一直翁二上人還揚州

來杭聽西
僧說

歲晚江湖尚此行從今一鉢老淮城聞聞見見元無法
去去來來豈有情肯復餐針效羅什獨能沽酒致淵明
風吹雲散各南北我亦歸尋釣石盟

次韻酬劉彥直

稷下先生舊老成十年江表聳雄名觀星南極孤槎遠
賞月西湖獨榻橫筆底篇章追夢得樽前風味勝公榮
酒樓一誦驚人句四座如聞霹靂聲

十二月十三日三橋小雪

曉樓衾薄夢迴頻闢戶寒光絕點塵各各一篷船未動
差差萬瓦屋如新高門定有豐醪餽下里疇能餽菜薪
隣叟踏泥共煎茗早云多有望晴人

次韻張仲實讀予近藁

平生窮到骨不受世人憐腸倒三江洗詩憑萬口鐫旂
常無可紀衣鉢尚堪傳今日如斯者輸君獨妙年

十二月十五日去年以此日歸

日月相望夕西歸昔問途焉知窮歲迫重寓客樓孤壓

雪彌河舫膠冰噤樹烏遙憐萬山裏兒女乏寒襦

十六日

來往江復浙擾擾一年間有子猶相隔無官亦未閒
病嫌真藥少債準舊書還霽雪樓前立依依憶故山

遇仇仁近出齋小飲次前韻五首

貧何所惡賤何羞寓物無心任去留尚有可人同臭味
足相間處與交遊銜盃痛飲真吾事挿架多書不外求
頗欲買隣今已晚石田茅屋仗誰謀

萬端

原闕三字

難宣此腹便便六十年寧作鴟夷長貯酒可

能

原闕三字

名錢一瓢陋巷應常事駟馬高車特偶然潦倒

原闕

猶勝苔骨卧荒烟

五字

知君曾次藹春陽與世多炎豈有涼書室相迎黃卷積
羽人同坐白鬚長此翁久客貧兼病今歲奇寒雪更霜
一餉清談百憂絕故知退靜勝奔忙

是日遇董靜傳道士

百斛明珠價尚輕新詩倍徙幾連城即今自愧才將盡

如我初無語可驚涉世磨治良玉出刀圭點化大丹成
豈徒麗習資朋友定霸須君主夏盟

我詩市匠製錐觴君集王朝粲璧圭奇語時常歌枕詠
佳聯直欲遍憲題猥思駕駕能追驥終愧東顰敢效西
赤甲白鹽三峽路無人肯泝浣花溪

仁近謂人不肯學李杜

歲除日陳正之劉彥質來奕

明朝六十遂平頭豈料耆年尚百憂遠憶兒孫兼婢僕
欠賣裹餌與衣裘倩人賒酒聊堪醉看客枰碁卒未休

旅

原闕一字

鄉心記今夕北風吹雪滿寒樓

大雪出三橋寓樓

凍雀愁鳶噤不譁漫天浩瀚逐風斜映樓橫過三千丈
接屋平鋪十萬家靜夜有窗皆貯月寒空無樹不開花
詩成欲撚冰鬚斷聊舉深杯答歲華

丙戌元日二首

猶憶兒時襁褓中天南跋涉到江東間關嶺海三千里
倏忽星霜六十翁追遠無涯心事苦苟生何益暮途窮

雪消日薄寒尤力獨倚危樓數過鴻

歛山巖瀨寄荆扉想見同時雪正飛
柳動梅殘驚歲換
兒寒女瘦望予歸
百年偏許詩名在
雙鬢能知世事非
社友踏泥肯相顧
酒錢更欲典春衣

正月三日立春

曾戴金幡勝如今有幾人尚能容
白髮屢得見青春
定力忘寒燠冥懷任屈伸
遙知殘雪地即復化為塵

感舊

春暖鶯簧絕宵寒鬼燐微美人應骨朽華屋已灰飛
巷陌名空在毗隣事總非昔賢歌麥秀不必淚霑衣

杭正月十三夜

歌鼓猶聞治世音逃喧愛寂自沈吟九衢翠鎖春

原闕二字

一室青燈夜獨深豈不凍雲開霽月其如老眼異童心

原闕二字

變幻涼州夢便覺繁華勝似今

杭正月十五夜用韻

隨緣徇俗豈知音戲隊遨朋舞間吟但信金鞍忘路遠

不知玉漏早更深春光月色相為賜公子佳人別有心
舊觀依稀百分一十年兵甲到如今

杭正月十七夜用韻

歌詞南北混鄉音猶憶仙臺萬燭吟俗侈觀優無不笑
令嚴罰飲必須深未聞曉闕落梅曲已動春郊芳草心
四十年前政如許白頭悽愴忽斯今

訪西湖鄭高士

真一

不為尋仙子吾能遠出湖水濱維舴艋屋角認梭櫓漉

甕分紅酒揮毫寫白鬚思詩看素壁待與再來書

喜賓暘再來三橋次舊韻二首

擬撩社甕共治顰難向春泥覓鴈蹤每嘆寄書多不達
孰知行役巧相逢道衣染褐驚新製醉鼻添酸失老容
盡日攜兒往何處歸途燈暗夜鳴鐘

城頭霜樹迴春色樓下冰河動水紋聯步即堪同拾翠
分攜猶記欲書雲祝摩膚髮終須盡

兩日予左肩痛且
髮瘍祝音呪音注

質粥書衣尚可醺彼我相呖兩難判未知百世果誰聞

喜寓軒張夢符侍郎下訪

事業更篇章從來例姓張茂先同晉軌

晉平吳張華贊之

子壽

振唐綱

張九齡相開元

已樹旂常績仍專翰墨場雲仍今接踵

月旦早名揚神劍干將出高冠獬豸昂褰帷初鄂渚杖

斧復錢塘士類星杓仰文聲電澤滂四愁肩慷慨七命

敵鏗鏘暖酌梅邊塚春邀柳下航留題存感慨屬和笑奔

忙羸劣慙形穢含弘賴疾藏一離湖曲路五換歲干陽

誦句思詩伯除官說侍郎班聯參冢宰銓部佐文昌北

壤蟻蛛割南邦翠蕩翔雪尋浮玉渡月認湧金墻不鄙
僑棲陋來同雅話長有書兼筆硯無酒但茶湯衰謝時
維邁羈窮氣尚剛斯人一青顧懷古視穹蒼

清湖小酌得生字

泯默抑幽抱低迴挫高情肥遯夙果決羈旅猶牽縈華
撫有舊習冷嗜無新營醲鮮世所競褒博日以輕小人
徇流俗君子懷友生浮塏豈不濁澄淵元自清丹楓昔
鴈落綠柳今鶯鳴蟄潛脫寒語孳乳陶舒明推排故已

順會合詎易并燠景敞重屋芳物綿脩城愧乏絲竹奏
劣奉穀歉擎張子霏玉屑趙老宣金聲予辯亦稍縱惶
恤聽矚驚邂逅一茲醉逝之南山耕眯目眩迅轍剛心
謝塵纓彼我跬步間奚翅重溟瀛

次韻賓暘池字

鴻鴈逐稻梁飛飛無定時槁草火不燼層冰風已漪觀
化悟茲理久甘玄鬢絲良願息我影不復天之涯云何
事行役黽勉營所私仰睇斗牛分俯觀朝夕池王氣忽

漸盡侂子猶謹嬉酸感諒徒爾得酒竟大奇是日春霧
霽西樓晝陰遲雲落璽楮墨電響紋秋棋幸喜暫合聚
寧忘條車離舟楫集津岸焉得長繫維前謝後花發東
起西星移爛醉未失策螺螔彼何知冥冥失馬福昧昧
亡羊岐終當蛻闕闐秉耒依農師

次韻賓暘子瑱草字

平生挾壯心長劍倚晴昊豈意日昊歌高臺化為沼沈
蛟九淵底翔鳳千仞表永言遯遐迹未覺鬱孤抱良辰

值佳友忽若詠鳬藻大勝新亭集洪流吟浩浩初筵客
或訝酒資焉所討曰予貸諸隣趁此風日好君看萬金
室一朝不自保何如酣中隱忘憂且娛老趙翁玉雪郎
弄翰頡頏早譽兒未妨癖長松緣小草

次韻劉君鼎見贈二首

汝鈞

厭聞世態已如聾舊雨人來久絕蹤自笑雲萍無定止
不圖針芥有奇逢侯門列鼎三牲奉田舍巾車一鹿容
試問吟懷欲何向定應羞傍馬醫鍾

真復多多窮傳記端能疊疊著詩文名場早捷千軍陣
臚陸應符五色雲亂後湖山今稍稍閒中賓主幾醺醺
哀遲亦欲陪賡唱未必當筵逮所聞

次韻連伯正見贈

古調於今底所尋麟膠忽嗣絕弦音驟觀布置如平易
徐認縈迴極杳深露下九皋秋鶴唳月寒三峽夜猿吟
寧為清絕更淒楚肯弄文君戶外琴

斷河酒樓得花字落字二首

忽此四十載弱冠來京華繆乘朝士馬偶駕刺史車謗
墨滿褚笥戰血腥千鄣良喜返初服草屨牧犢緞曷乃
浪復出頭雪眼已花市人幸不識徒步趨酒家驚倒道
上客高樓何謹譁醉卧忘解衣巷甌朝鳴茶

六客三老翁范張雅善詭逆耳兩能受傍觀殊錯愕當
其未醉時容言極溫恪美俗誇英多玄理探敷落罰酖
弗少恕談鋒遂相斫儻非德將之豈不咎狂藥紅塵玄
都觀玉樹臨春閣此感獨慨予默然引深酌

范景文
張性之

次韻賓陽啼字猶字二首

醉眼看東誤作西
衣縑巾醖屢拖泥
身無却少心徒壯
花自重開草更萋
信馬舊痕今已滅
干虹老氣似宜低
樓中是日喧呼甚
聞說隣兒亦止啼

往年燈火醉樊樓
月落吹簫未肯休
不惜黃金追勝事
肯迴青眼顧時流
燕來鴻去春光在
死易生難病脈浮
更問西池賞花約
心雖欲往豫兮猶

次韻范景文鶯字早字二首

醉眼無國色醉耳無霆聲醉卧亦無夢一醉泯七情宿
醉魂死矣誰歟奠孔楹酒醒魂忽還里巷無不驚決定
一鍾埋絕勝五鼎烹詩人張公子中年捐燕鶯獨肯從
我輩共醉爭籌觥果能再一醉勿爽游金明

深衣講儒業羽衣學仙道變性欲變衣又謂田衣好三
义路口人左右惑憂抱不如從我游一醉玉山倒美豈
無蘇小富亦有王老誰能一斗間百篇挺華藻范侯詩
酒流觀國聲譽早睥睨蛉螺豪百萬可一掃

二月十六日夜獨酌思歸四首

閒憶山中一片雲歸歟莫待草風薰老身豈可為形役
俗語何堪著耳聞乍醉乍醒終鬱鬱孰非孰是幾紛紛
顛寒踣餓男兒事已辦淵明自祭文

聊復埋身麴蘖昏倘來倘去肯銷魂瓦猶幸有三間屋
絹可全無二丈禪壯士笑談躋將相寒儒衰老誤兒孫
社公雨作春燈暗獨盡花前酒一樽

不謝車塵覓餉喂前行後指亦危哉一貧牽絆似繩縛

百怪攻攢如箭來自倚此中惟拙直未知何故每驚猜
是堯非桀俱塵土且可深杯更淺杯

樓前春水欲生蛙樓上無眠夜憶家官道靴鳴知有雨
故溪船去好移花耆年極荷神祇借直性難禁世俗譁
便可真歸不須夢爛烹新笋煮新茶

二月十七日偕賓暘市飲二首

誤著儒冠玷甲科休官重到舊沙河未妨緩步微行好
猶恐傍觀竊議多我輩相逢唯酒可桃花如許奈春何


雪兒人物今難得一曲離騷醉自歌

無官豈畏犯金科飲量真能海納河人老自於春色淡
花開最恨雨聲多向來伴侶今都盡乃後光陰復幾何
更挈殘樽趨曲巷小姬摘阮和燕歌

雨中飲賓暘次前韻二首

早欲升堂學四科晚年萬事已談河花時氣色晴明少
海內交遊老死多徑醉不須商可否急歸猶欲避誰何
春衣難典黃金盡尋紫陽溪理權歌

胷中了了詎同科混合光塵濟貫河割據市樓才斗大
懸知官酒太灰多足相娛樂唯君耳不少盤旋謂我何
勿笑詩成欠流麗予官采取可弦歌



桐江續集卷十

欽定四庫全書

集部

桐江續集卷十二

詳校官中書臣孫溶

主事臣呂雲棟覆勘

總校官庶吉士臣倉聖脉

校對官中書臣孫球

謄錄監生臣沈方大

欽定四庫全書

桐江續集卷十一

元方回撰

朱橋早行

田間夜打稻茅茨耿明燈客行過籬外吠犬似可憎放
馬嚙露草小憩寒塘塍坐念今民間貪吏無與繩幸此
歲稍稔庶足供科徵不然豈不窘況乃軍旅興往者孰
柄國未謂杞遽崩偽心感咎證水旱常頻仍茲獨有年
屢天仁良可憑緩轡忽得句數星陂水澄

楊村秋曉

今日定復熱月落色亦紅東方垂欲明忽被林霧濃已
有牧牛兒出沒黯淡中暗行三十里兀兀視馬鬃天宇
悉已白始見真秋容宿鷺起空際鳴雀出林叢何所最
可喜稻熟歲粗豐人世強食弱生生終不窮干戈洵海
宇幸存茲老農古來幾魏徵死為田舍翁

富陽田家

自從喪亂來嬾復治生事行行過田家因之動幽意早

稻青已黃晚稻亦垂穗
雪雪割稻聲自與割草異
是時秋欲半蒲柳風日脆
兒卧牛自行客熟犬不吠
螃蟹出籬間茅茨臨水際
使吾劣有此亦足活老稚
宦學四十年進退兩不遂
扶犁手尚可奈無可犁地

早發新城港

月暈竟無風亦復無社雨
俗諺猶不驗況乃古書語
客子上桐江清曉發鳴榔
如何秋令半猶此苦劇暑
爬膚垢滿爪汗流如炊煮
今年夏苦寒懸知當有許
二僧昨

同舟斗酒取無所竟夕卧復起飢渴相爾汝向背迷星辰
回環莽洲渚誰家火獨明浩歎感今古

過楊華父宅與二僧同舟不及訪

每喜佯狂叟窮途說共財忽辭酒仙市徑上客星臺鼓
枻攜支遁過門憶老萊恐勞雞黍具或可致新醅

秋大熱上七里灘

俗名漏港灘

吾生所未見自古恐亦無秋半不肯涼赫日炎洪爐沸
湍七里灘觸熱乘畏途坐船汗如漿況彼牽挽夫一櫓

合衆力至數十輩俱踏竿氣欲絕沙立僵且枯西瓜足
解渴割裂青瑤膚焉得大冰盤露丐及此徒僥倖據勢
位極意求所娛願迴君子心畧念小人軀

大浪灘步至東館

瞬息閱一紀作郡初此來小城雖寂寞尚復具輿臺患
難偶未死更乏良可哈夜泊大浪灘沽酒登崔嵬隨我
別無物但有雙破鞋破鞋足徒步何必車中栖質明日
尚涼行行高峯西秋暑草不露脚脛黏灰埃破屋一小

金一八八二
卷十一
懋老嫗若見哀萬事豈可測熙怡付齊諧

八月十五日二十日兩至南山飲瀟灑亭

悠悠桐江水寓廬十二年重來六日內兩日登南山南
山有何好高閣西北偏隔江三千家一抹烟靄間閣檻
一巨松挺出衆木前野性所酷愛老藤相糾纏亦如我
與僧相對談幽禪稍遂物外性屢寫酣中篇故侯復齊
民鬢髮成華顛念當捨此去焉得長周旋

西齋不寐三首

八月二十二
日夜五更

夜卧户不閉夫豈無窺覩兒定知我空室一物無向
來窮太守解官五載餘小兒近挈累故鄉已寧居棄屋
竢買原闕一字竣事將屆途囊中米幾斗案上數帙書弊衣
及破褐載之不盈車飢寒久安命不寐何所謨歌枕背
暗燈自笑如鰥魚早知事乃爾曷不傾我壺

午醉稍就寢甜夢何翩翩晚醒漱茗飲終夕斯無眠初
數一二鼓乃至三四遷草根沸蟋蟀鳴鴉號樹顛衆靜
汝獨否誰實使之然聚螢車生憤飯牛甯子歎吾衰百

念灰曷為不遑安天宇未肯白秋氣令人酸孰是無憂

者

原闕
一字

然衾帷間鬼神知此心起盟書短篇

寒近衣猶單暑退扇已擲生世成何事卧念夜歎息四

壁候蟲鳴不啻千且百其鳴果何謂霜

原闕
一字

還復蟄大

塊

原闕
二字

民生死互促迫嗷嗷食土毛減去竟無迹髣髴

昔何

原闕
二字

今習六十於道粗有聞屢空未為厄意長歲

年短慮闊世俗窄欲為熟睡謀可無伯倫德

與起來芳三上人遊北山寺

癖性愛古寺鬱鬱烏龍山癖性愛古樹萬松擁禪關偶
與二三僧共此一日閒索茗古寺裏繫馬古樹間樹古
生涼飈寺古殊塵寰古貌各清怪古心俱恬憫忽有古
笛聲牧兒度前灣古人謂不足古風斯已還

戲簡楊華父

落筆知學力開口見心事吾嘗持此說以閱天下士楊
侯老病軀斗膽傲一世王公敢唾罵聖賢自位置貧至
典深衣猶抱禹稷志立論無令人作詩有古意半夜起

醉歌達旦不肯寐佯狂未為非賈禍亦可畏築屋五百
間誓言恢講肆何如覓阜角浣濯暑服膩

南山寺瀟灑閣呈川無竭二首

獨騎瘦馬破枯苔要與高僧共茗杯山閣雲晴天

原闕三字

帆潮緊日邊來藤陰樹影東西缺野色秋光左

原闕四字

中

間無障礙豁然宇宙一靈臺

每從水際上山巔歷磴攀梯欲到天北岱南嵩前後閣
東吳西楚去來船詩牌字沒先朝蘚梵磬聲飄下界烟

原闕
二字 登臨定分首不知重會是何年

同川無竭觀旃檀林東窻見婺州港定此為句

心欺勁竹傲長松鐵面霜嚴舌有鋒遙指水光來發

原闕

二聽鄉語半吳儂貼詩滿壁誇佳句答語當機破

原闕
四字

歸來大風雨定知一鉢已降龍

題魏公輔詩卷

天佑

年少學詩歌悲歡忌太過未能全勁瘦已覺近平和嫩
藥隨時摘微瑕極力磨成名待三十存藁不須多

題徐子愚道悅堂二首

師顏繼母年七十三分教信州歸作是堂予為作記

往年辭膝下侯類領儒冠遠憶門閭望遙歸澗谷盤即
今惟教子不肯更求官何限公台貴親顏未必歡

高門可旌表瀟洒郡城西沼有王祥鯉埒無郭泰雞寒
衣催婦織奇字課兒題堂上慈顏近家人語亦低

重至秀山售屋將歸十首

無復黃金帶空餘白雪鬚滿城驚再至一馬與同癯意
廣輕餘子時難老腐儒故園猶可灌終不歎窮途

秀山山下榻歌枕肯重來醉任門無掩貧知盜

原闕四字終

夜聽老樹幾年培歸橐殘書少舟輕亦快哉

高下花千樹東西屋百間一毫非易得雙手竟空還
勇銳傷輕脫愚冥昧險艱全城保生齒終覺愧衰顏

全家先去盡父老莫依依故是猶相愛其如自合歸
亂山回醉眼急雨迫寒衣不用空惆悵初來計已非

賃舟歸亦易猶欠賃舟錢殘闕書難售空寬宅盡捐俊

原闕一字吾所慣幼稚自堪憐生世都能幾嚴州十二年

本謂馳亨輒焉知蹈駭機七年當郡寄一物不家歸池

原闕
一字

魚猶聚庭看竹未稀後人低價得應免苦相譏

百戰黃塵裏偷閒我亦能隔牆呼酒友過渡訪詩僧謾
說銅分虎寧防玉點蠅千金牘背事空復憤填膺

雖曾為太守過似布衣貧未足肩前輩猶應勝近人苦
吟常不寐得句忽如神玉食輟東市何如保幅巾

離亂斯人致艱危我輩當渾淪俄破碎桀黠盡飛揚吐
舌何能已捫心肯自量忍窮非左計天象看弧狼

田園亡失後兒女長成時救急終無策紓憂漫有詩數
年為去計今日是歸期把酒東籬處黃花賸幾枝

秋夜聽雨

騷騷從何來高樹暗淅瀝颯颯未云已虛簷微點滴

原闕

二字忽遽作稍踈仍驟密寒飈尋侑之浩洶陣馬隻

原闕四字

翻濺瀉類朴擊決渠落深沼鞞鞞激水石衾薄四體

原闕

二字減百慮寂閉目觀我身未覺白勝黑已而悄然靜鳴

聲惟蟋蟀質明鞞破鞋滿砌落葉濕

八月晦甲子雨至九月二日懷同來二僧及兩子

明孫
生日

今年夏潦甚秋暑亦云劇幽霜屆授衣垢汗著單浴園

渴困力灌井竭疲遠汲甲子似宜晴一雨竟三日

原闕
四字

僧溪漲渡欲隔頗復念幼子餅蔬誰與摘此地非我家

暫到猶是客歸舟可上灘深湍沒巨石貲費殊未辦褐

粟闕補糴空庭無來人爬痒看簷滴

九月三日晚登秀亭分韻得七字

登高佳辰近暗數屈指七古郡擁亂山危亭低落日未
堪摘嘉菊亦且醉新秣矢詩記同遊是歲實丙戌

分韻實得閒字再賦

一城最高處晚色引躋攀莽莽斗牛野重重吳越山秋
將佳句畫人共老僧閒聚首非容易何妨酩酊還

九月五日所乘小驄不起

瘦骨如山老病驄圍邕治藥竟無功豈徒倖儻權竒惜
曾與艱難險阻同萬里風沙來往外十年賓旅送迎中

原闕 一失真難得寧少人間女頰紅

二字

再賦惜小驄二首

駿駛元奇崛馴良茂等倫窮途曾盡力徒步始傷神未

易營阿堵何由肖乞銀佛書端可信當復轉人身

元和郡國

志乞銀城北
語驄馬也

駿骨直千金難求起死針雖云為馬

原闕一字

却似有人心

羶帳長城遠旗亭委巷深老身全賴此完壁到如今

九日南山寺

佳節攜壺意全如杜牧之百年誰不死九日可

原闕四字

差

能飲平生政坐癡胸中不酩酊未許野人知

九日歸自南山

山寒小雨晴落葉獻秋聲酒可諸僧共詩須此老評鉤

簾脩竹淨闢戶遠江橫相送依依意丹青畫不成

四僧送至

石橋

寒士吟

小貪啞蚊蠅大貪噬豺狼此類殊不少毒虐紛披猖獨

彼寒士者自身無衣裳唧唧如蟋蟀與人憂雪霜平生
謹繩墨絲銖較詞章寒士苟無命低垂困名場風塵一
以起盜賊腰金章寒士但忍餓顏色無晶光豹胎紫駝
峯不到寒士腸斧礪斫將相寒士亦不忙

十一夜無寐懷九日南山之遊

代步僅一馬奄忽乏敝帷扶輿陟南山幸有淵明兒樹
陰玩苔蘚稍讀古板碑江湖豈無人不如僧能詩

原闕
四字

杪竊慮高必危穩坐勿競險義農端在茲歡伯偶就招

引滿奚容辭未飲覺秋寒既飲忘百為何以得渡江醉
中初不知至今酒醒夜絕歎斯遊奇

西齋秋感二十首

并序

前輩有秋懷有感興予將歸紫陽留秀山寓居

之西偏九月欲望合秋與感吟

闕

少年妄有意與世扶危顛神遊渺八極詎嘗

原闕
五字

覆天

地鼎沸同熬煎勺水空自揚偶茲微命完貪夫遂

原闕
一字

欲得所恬以安君子抱古見十事十不然觀人眼難開

不如返自觀此心既已了口亦何必言

尼父歎逝川匪惜歲月流斯道未嘗絕是身當自脩蒼
姬尚可為遽已云繼周代謝理必爾天命夫何尤騷人
痛楚亡哀怨悲凜秋汝能護青陽終不黃落不至人盡
其心分外非吾憂所以牛山淚徒為晏子羞

寂靜無所為宴坐觀我天此心儼不動豈即非聖賢孰
謂軻也死斯文遂無傳鳳麟有背角煎膠寄遺編歛之
入方寸可續千古絃世人不識察自眩良獨難仲舒聊

下帷子雲姑草玄與世留醫方良醫其舍旃

血氣少未定所見恨淺局百鍊至老成精力已不足

原闕

二字著法言紀事纂實錄向來竊有志遲迴未欲速

原闕四字

盡斷簡浩難續意長歲月短雪髮忽已禿德功兩莫攀
其次當自勗山中假餘年不遠尚可復

蛇鼠必夜出鴟鵂以暗鳴有時亦不然白晝或縱橫風

俗昔忠厚文物當承平一夫負微慝不逃清議評古道

原闕二字

喪時危驚亂兵姦黠逞所為氣驕貨寶盈一有指

與譏禍患可立生儒士菜色面仰天但吞聲

老態夜乃見終無甜夢期西齋卧空壁適值殘

原闕四字

寒

雨來此聲世誰知四更遠鷄鳴披衣起題詩舌根涎唾
盡汲泉漱空頤聊寫鬱結心稍寄幽婉辭量近何所苦
驚遠將焉思一夕漏鼓五不寐常四之

孤燈閱近史傷哉宣靖中起兵破中原不在鴨綠東乃
在江之南臨川一老翁文高學本僻行急名驟穹性命
了未諳物務貌弗通聚斂改法度開邊興兵戎祐符不

坐黨粘幹馬來攻朽骨諒已盡遺禍猶無窮

治平丁未
靖康丁未

淳熙丁未淳祐

丁未人四十年

明年七袞開頭白馬用悲佚樂或早死老窮君勿嗤幼
小入學堂憶我十歲時堂宇化為灰無復同學兒二十
上京華生齒何熙熙千萬骨已朽世換朝市移夜枕念
此事百感心自知颯颯落葉墮浩浩寒風吹

我家清溪上門臨紫陽山有一不死人垂雲邀其間

原闕

二所著書隻字不可刪上言造化樞下述性命關

原闕
四字

病再讀開心顏讀之三十年騎鵠超塵寰蒼生苦無福
朽竹秋苔斑浪求西王母八駿空迴環

聽雨勝觀雨觀雨須高樓細雨或終日高樓令人愁不
如空齋夜聽雨詩思幽雨作樹聲洶萬葉鳴颼颼雨止
簷聲絕忽續一滴秋此時佳句來自得不待求暮年識
此味

原闕一字

廬真宜休何如大醉眠紅日生床頭

鍾動市聲絕夜禁嚴鞭笞獨許浮屠氏饒喤恣

原闕四字

有

病死信巫不信醫既死又信佛佛事殊不貲兒女數歡

戲頓失哭泣悲一家不若是里巷訕笑之高堂十七篇
豈不存喪儀世事無一古儒業偏獨衰

靈連永嘉日玄暉宣城時池草既清唱窻岫亦妍辭郡
勝山水媚心賞良足怡廟廊有顏沈味合深已知桐瀨

較二

原闕
一字

川嶺信復奇拙陋方二謝豈不粗能詩兵革

值遷變衣冠逢亂離已矣莫我識悵焉歸棹遲

池塘生
春草窻

中列遠岫二謝兩郡絕唱時

有顏延年沈休文在廟堂

木落雨浙瀝燈昏鼠窺覩早卧定不寐魯經略卷舒共

姬一婦人葵與嫁之初四十三年間九見褒筆書傳母

夜闕一甘就焚如枯表此以愧彼有軀不如無西子沼

人國改事邀五湖嗟嗟東昏侯猶不失玉奴

是夕讀公羊傳得闕

如仁故宜褒小器自當貶聖言存至公功罪豈相

原闕三字

微此人孰禦匪茹獵歸坵備大夫亦已越繩檢末季饒

檣餐妄自作崖戶聘室至無筭食玉不云忝絲毫靡建

立日夜煽虐焰攫啖知飽足曾不如猿噉

里選出井田賢能貢王都亦有起農畔在官為胥徒河

汾著中說明明析二途鞭筭尚察此廢吏寧用儒顧義
不顧利可與論唐虞識字不識理止合供走趨一日抱
公牘千金肥爾軀槁項泥六籍歲晏寒無襦

欲雨雨不墮謂晴晴無期秋陰白日暗黯淡寒雲垂華
盛不長保百卉忽已衰蕭颯枯草中嘉菊遺妍姿淵明
但熟醉不作騷人悲悲更盛於騷俗士焉得知感極每
欲死唯酒能寬之幸有杯中物勿惜時一持

齊梁陳隋詩真可以不作至如晉宋間淵明可無學盲

統集文選似以別報璞後生今寒蟬焉識獨唳鶴緬懷
東籬間用意極玄邈筆勢所到處足與二雅角心期重
華並襟度大庭朴瓶空無酒斟肯受寄奴託

寒士足奇士貴人多俗人俗人尚自可盜賊乘風塵子
美客長安悲歌驚鬼神柄國者誰子曲江近前嗔逆臣
自此起強藩由是振乃至餓隸輩貂冕垂長紳狼狽老
拾遺拾橡逃隴岷我每讀其詩吞淚聲酸辛

吾所學詩伯近世惟二陳稍換後山骨復寫簡

原闕
四字

足

活法亦復窺天珍妙年張文潛晚節呂居仁書名始畫
屋但疎勿與親雍容曳紳裾彼為何等人去去白雲外
保此詩酒身我死或不死汝死為埃塵

江上楓已丹林中橘猶綠天寒百骸痛抱膝玩幽獨生
世六十年鮮榮足憂辱賦歸棄空廬惜此數竿竹兒孫
共十輩何計給饘粥萬事不如人唯詩尚可讀秋感二
十篇夜斷朝復續開樽寘前庭一杯歌一曲

喜賓陽歸

魯翁秀山歸虛翁錢塘留虛翁秀山來魯翁錢塘遊中
秋前三日西東各登舟及至中秋夕兩翁空相求是夕
亦無月欲飲無朋儔重九謂胥會獨醉南山秋風雨更
旬餘掩關空室幽忽聞落葉響野屨穿林陬驚視乃魯
翁虛翁失百憂急呼一斗酒菓茹與兒謀俗態定難詰
時事勿浪籌默酌無一語世人知此不

送起上人

嘗徒步遊五臺至松漠同予至嚴瀨
留南山兩月還徑山福唐人孫氏

五臺秋雪外一鉢幾年歸名利今無數真僧似此稀萬

山供破屨九月耐單絺定憶穿南麓同聽落葉飛

送來上人

台州人汪氏
律行甚精

同公遊兩月語少道懷深自了為僧事終無住院心

原闕

二攀老樹蘚石上危岑蕭閣題詩處何時肯重尋

次韻賓暘齋中獨坐五首

舞燕歌鶯子所無不無燈照短檠書酒來形影相酬酢
詩就烟霞共卷舒八極渺茫供傲睨一襟空洞極恢疎
世間底是英雄物未許曹瞞笑本初

詩來似訴屈原醒阿堵於公頗不庭白水真人從斷絕
丹元童子尚神靈秋眠簟未捐桃竹晚食齏應勝韭萍
肯美張蒼肥若瓠從來吟影只伶俜

蟻潰金隄薄俗頽聖門誰與嗣雲來良難託諷追風雅
只可微辭紀定哀有志向能穿虎石無疑今始悟蛇杯
掀天氣燄吾嘗見轉首空成一聚埃

誰歟載筆掌絲綸霧雨何傷隱豹文絕望都俞參稷契
劣能損益記周殷蠹殘書冊猶堪覷草沒堦除儘不耘

鄭老襟期少陵解從渠衮衮更紛紛

慣忍飢窮即聖賢松心玉質未貞堅苦無知己庸何憾
斷不逢人便乞憐龜鶴筭高終老死星辰位定有推遷
味公獨坐詩中意可惜侵尋絳縣年

十月三日秀亭二首

天憐遲莫與清閒閒上高山看遠山世味已如元酒淡
名場肯復左輪殷千爭萬競塵埃裏古恨今愁莽蒼間
原闕誰來問詩叟應輸老樹識蒼顏
二字

亂峯古壘一荒臺自笑衰翁去復來石怪更宜添薜荔
樹枯猶許寄莓苔四天無壁供詩眼萬古皆空付酒杯
惆悵遠慙羊叔子秋陰欲暮角聲哀

不寐

眇忽微茫一入思穿天匝地遍垓維殘秋夜靜山深處
孤客燈昏酒醒時自寶此身方有壽不窮我輩更無詩
少陵同谷七歌在每一歌之淚欲垂

十月六日小酌以自寶此身方有壽分韻得身字

一從鼙鼓沸烟塵十士相逢八九貧
夢境誰能為達者
醉鄉猶幸屬閒人
剩留佳句傳來世
謹護風寒養病身
歸去吾家有何物
豈無江水濯緇巾

次韻謝河內張明府

德徽

來訪

此老良高誼能來問故侯
人清嚴瀨水家住沁園州
兀坐元無事閒談幸少留
重逢定何日歸夢在瓜疇

別秀亭五首

秀亭亭上果何似
兩水萬山圖
畫開霜入川
原疎草木

烟銷城市出樓臺半空鷺點客愁破何許笛吹詩句來
異日夢魂應歷歷醉僧同此藉莓苔

七載專城間五載賴逢此地足娛賓高憑遠眺最佳

原闕

二字飲能吟凡幾人晚輩漸催前輩老來時豈料去時貧
是身朽腐心無愧他日誰能踵後塵

醉翁亭記四時樂我樂謂何寧不慙滿地落花供妓席
隔江殘雪認僧菴邦人解學推敲勢野叟時同爾汝談
盜賊猖狂兵革沸誰憐此老苦中甘

市人指點應怪訝拄杖倚空何所為
戍角征鼙曾洶洶
樵歌牧笛尚熙熙風流剩有登臨興
搖落寧無代謝悲

原闕
二字

翁詩吾解賦昇平不似放翁時

作郡說貧人肯信屋今售矣亦無田
囊中詩藁三千首
案上書燈十二年馬死尚難求別馬
船歸不過駕空船
秀亭手種花如錦回首春風一惘然

予往來嚴陵十二年得詩三千餘篇

乳虎行

伏雞護窠能搏狸人物一理誰無兒
南山斑寅產三稚

野人採樵遙見之蕭蕭落日黃茅塢睥睨田家窺水牯
唧歸穴中哺爾雛豈不此心慈父母射石沒羽李將軍
兩老於菟如有聞偃鬼夜報旦出獵遁逃遠入千重雲
縱火鳴輦括原隰生擒二彪逸其一食肉寢皮勿遺患
壯士揮戈血鮮滴滴血滿地遺腥臊頑嚚昏昏來咆哮
舐沙齧土擦樹木如哭如泣空哀號君不見楚靈投車
痛子死爾殺人子亦多矣又不見祿山反噬逆天理逆
雛先斫長安市渠魁未縛嫗與翁兇酋肆虐焉可容安

得馮孺卞刺掃此輩假威之狐羣亦空

夜思

讀書不見理作詩欲求名定非百世士苟且誑此生蹇
予脫萬死老氣空崢嶸莫年識見進深夜精神清一燈
何可暗鼠輩將肆行不惜三披衣續膏挑復明

鄰飲

鄰壁偶過從舉杯相爾汝初筵供園蔬鹹韭最為美稍

原闕一字

始進果乾栗頗便齒數十至無筭醒已五鼓矣問

言案酒何唯獨螃蟹爾萬事不稱意此乃差可喜

餘生

餘生如涸魚斗水足可活父子自相濡不望江湖闊使
吾道當亨時平已身達運往年歲莫滋厭耳根聒與其
强磬折孰若謹囊括心憐童穉飢此事亦已末

少戇

少戇不識事誤以仕為生三已至四五貲用都不營兒
累僅十輩捐田無可耕傍觀不勝憂餒死諒亦輕肉食

或色墨夢寐心膽驚瓜田良寂寞當無走狗烹

夫容

粲粲夫容花昨日猶鮮妍顚顚忽乃爾霜實使之然南山有松柏初未見貞堅弱草一已萎獨立衆木前世不逮王霸天猶生聖賢君諒達茲理何用常憂煎

稚虎

檻車二稚虎舁者過牆外犬何自知之怖慄竄牆內萬物各有氣遙感不待對玉寶潛地底九霄露光怪一夫

全其神山靈百妖退矧乃重華時濟濟夔龍會

寒燠

仲秋帆

去聲

清湍單衣滴垢汗曾不兩朔望擁綿熾爐炭

萬古正如此寒燠頃刻換愁人苦夜長志士惜日晏何似酩酊翁惜不辨昏旦百年會有盡一朝非所患

十月十九日小酌分韻得里字

奠國荷隆棟扶世納夷軌勲庸書盟府名氏垂信史畫餅既無成墜甌亦云已幽哦陶倦情間讀探玄理嗜古

植雅正憤俗馘淫靡尚堪輩前哲未屑睨餘子寒門車
馬絕良月風日美旁近東西鄰邂逅二三士無錢馬能
神有酒猶粗旨炙臠割肥羊鱠材斫長鯉隨分匪強致
乘興肯中止鈎深出該洽砭疾伐鄙俚縮頸罰令苛撫
掌戲語綺豪歌眇羣兒大笑驚數里一翁醉而踣兩生
掖不起心廣窮亦樂氣衰老且死生生天壤間知命者
罕爾予將歸萬山後日當憶此

賓賜甚
醉而仆

讀宣樞南山朱公

襦孫

遺集二首

呈朱
用和

疽根蟠閫內命也可由人蜀雪猶堅壁江風已震鄰功
名拘氣數文字見精神仰藥臨危日何曾愛此身

公為京湖

四川宣撫使陽羅之失乃中流蜀猶至庚辰也

廿年前一見池口卸帆亭老子髯初雪門生鬢未星漢
衰諸葛死楚恨屈原醒惻愴觀遺集猶欣有寧馨

同年常簿吳次翁

雄飛

子萬之

必大

萬之子直卿

端孫將為分水學官喜而賦之

一點書燈傳不絕王侯卿相復何加追惟大父同科第

喜見聞孫紹世家與賸蚤能探理窟芳妍孰敢競詞華
勿言小邑青衿少要使人人讀五車

夏自然

希賢

惠五言古體久之以律體和謝

古五言詩今罕見把看愈久愈精神何能筆下有斯作
似覺眼中無此人政用整嚴藏細潤元從冷淡出清新
着鞭更與追陶謝莫向齊梁踵後塵

贈徐可大

洪父

近旌表門閭

畬粟鋤山稻田少歲常平價發倉儲鼎來官職諸公有

特表門閭近世無甚至不乘果下馬自應早獲掌中珠
端能賑施終如始定見階除曳紫朱

十一月旦泊大浪灘下甚雨醉卧次日乃知

夜雨徹五更江水長三尺醉卧了不知開篷灑餘漉蕭
瑟復未已北風阻行色篙師請祭神索我留半日牲酒
豈敢靳望山頭屢側俯船勢欲壓檣頂立峭壁何物野
人家庵有此奇石長安車馬塵兒生初未識雞犬巉巖
間亦各適其適休官窮太守久混漁樵席顧影歎鬚鬢

向來無此白一瞬十二年夢過竟無迹

初二日甲子雨阻風自次韻

居民汲江水上下幾千尺麴蘖化為酒不肯賒一滴高
林墮黃葉草樹黯無色詎意阻風人於此費永日蓬低
首難擡薪重舟頗側醉鄉失樂土愁城遇堅壁呻吟得新
句欲往題蘚石岸滑不可登縱寫復誰識故廬百灘西
何事乃東適兀坐但默然順走閱健席豪舉與時會洶
湧浪頭白及夫氣勢盡泡滅豈有迹

初三日水長二丈早行

夜聞舟人呼江水溢二丈岸薪隨波流救者何擾攘
亥子十月交地氣不當上十日柱礎汗蠅蚊闔帷幌此時
肯為雪豈不兆豐穰積熱化滂沱傾空瀉盆盎前夕適
醉卧不省船背響濤聲撼醒枕於茲發孤想炎方節候
乖病叟體膚痒遑遑欲何之曷日中園仰星斗猶粲然
曉征發雙槳起視所泊處餘燈煜莽蒼

新晴過張村舊巡檢寨

干戈踰一紀幾度此江邊近覺全無盜仍欣粗有年炊
烟生古屋晴日照新船猶憶紛紜際偷生盡可憐

過釣臺

真人飛白水屏跡獨蒿萊漢祀無宗廟嚴家有釣臺高
風真可仰逝水自堪哀擾擾俱漸盡千帆日往來

夜發長山隴

水面浮暗山沙頭耿微火好奇引吭窺畏寒縮頸坐首
取帛為祲體用衾自裹篙師喜風定半夜起勁柁平生

江海耳最與櫓聲可詩從是中來孰謂此計左起視何
茫茫未覺萬有夥浩然天地間身世寄一舸恭惟百鍊
心用世亦云頗早乖晚彌誤遲莫困旅瑣饕婪忌潔清
軟媚惡剛

原闕
一字

殘生信已矣古來豈獨我

夜下富陽不寐二首

夜寒吟至曉獨立思冥冥浪聒風兼水光搖火似星微
勞何足歎大患累曾經更念行船者筋骸不暫停

櫓聲戛鵝鸛風緊已為霜少假愁人寐焉知旅夜長天

寒星燿燿江閣樹微茫底用胥濤急吳亡越不亡



桐江續集卷十一

欽定四庫全書

桐江續集卷十二

元方回撰

丙戌十一月二十八日南至寓杭

卧厭鄰人聒晨興亦喜晴心知雲氣好眼眩日華明
吾事元無節南方暫偃兵新粧小兒女誰識舊承平

至後

三厯推周正今當七袞開不應嫌老迫更用著愁催
酒竭傾渾滓爐殘戀煖灰故園歸去好移樹及春栽

寓杭久無詩長至後偶賦懷歸五首呈仁近仲實
嚴灘合問紫陽津誤簞西湖寂寞濱老子通身唯是骨
梅梢作意為誰春飽更世故全如夢慣忍霜寒最益人
莫笑龍鍾開七袞含珠何限已成塵

天應知我厭驅馳故遣虺隤掩敝帷

舊馬僅存其一
今秋亦失之

一

紀窮愁嚴瀨夢三年長至武林詩山深無事尚堪隱歲
暮不歸何所為此世與身總非昔可能杯酒答深悲
同雲欲雪暮天陰濁酒樓頭手自斟漫仕偶嘗叨五馬

倦遊何止喪千金盡捐寓宅償逋負僅保殘書伴嘯吟
從此日長夜應短未妨微耐曉寒侵

荒城夜悄不聞更小閣藏燈暗復明酒已半消詩未就
雪應欲下雨微鳴漫欣短晷迴長至轉覺前脩愧後生
歸與兒曹煮春齋故應有味勝黿羹

酒朋詩友遍人寰大半彫零喪亂間野曝尚分黃道日
春耕欲老紫陽山少年多病豈知壽晚節忍窮才得閒
身隱亂雲萬重外誰能書札問柴關

飲歸

漱灩紅深百盞澆醉歸不覺路迢迢臨分情味慙慙甚
暗遣人扶過畫橋

雪後樓望

健走看肥馬飢號念凍鳥聊須闢窻戶何敢犯泥塗枯

木癡如死遙山淡欲無寒天古城外誰共醉澄湖

丙辰靜齋

魏公克愚明已為司農寺丞雪中攜小姝酌
耐泛湖今忽三十一年魏公物故十八年矣

送師好古歸青社

姓字喧吟社吟鬚亦未生更能十年讀詎止一時名政
爾推英俊終然要老成聞韶問遺俗肯學飯牛聲

雪霽冒寒

苦寒猶彊忍空闊倚樓前春欲回江國人皆喜雪天病
須攻此老窮已極今年乘興吾何往西歸問釣船

武林書事九首

明年老子六十一最憶隻身三十時豈料衰遲脫離亂
三孫三女四男兒

竹林七賢六有子何獨無聞劉伯倫夢想先師授書處

城東風雨卧荒墳

林下惟劉伶子無聞先叔父八府君
瑒字元圭回師也立後而絕墓歎邑

東

金石典古呂伯可風霜清聳方巨山尚見八音合韶樂

早能九鼎象神姦

吾州左史竹坡呂公午文有朱晦菴
風吏部秋崖方公岳早斥荊州牧者

二老先生皆
謂回可教

公田坐謫魏京兆一往不招江上魂天道無知善人啞

全家死盜五孫存

府卿京尹
魏公克愚

狐狸夜號歌舞地荆棘非復向朱門有人政自不可測
一斛檳榔五百禪

歲在戊午正月五代宰臣供萬壽詩鳳凰山下芙蓉閣

龍礎無蹤世不知

寶祐丁巳冬代丞相訥齋程公元
鳳為明年天基節詩十首稱旨

論斤買蠶遺俗在街頭商賈問童兒不知此菜從何采
指似深宮故殿基

蘭閣蘭閣一彈指高鼻人人俱喜歡北客近知郎罷語

南人許拜乞銀官

乞銀驄馬出
元和郡國志

我有敝廬在何許南紫陽山北黃山烟耕雨釣付兒輩
一榻高枕松聲間

次韻仁近見和懷歸五首

諸公合沓據天津往事微茫問漢濱老病腐儒無可意
雪霜死草有重春散花不復來天女中酒焉能致聖人
誰且生塵賦羅襪吾家已恐甌生塵

輪蹄追想禁街馳尚有君平賣卜帷遁世久忘三接卦
懷人空賦八哀詩歛華就實嗟何及悟往知來尚可為

歸去井梧應好在白頭江令自堪悲

日短晴窻頃刻陰乾坤萬慮入孤斟故交剝見車逢笠
初學誰羞屋畫金菱鏡豈堪朝幌覩茗爐聊伴夜瓶吟
生平不倚心如鐵似覺難禁世故侵

萬險千艱歷歷更是非他日仗誰明著書何用心徒苦
歌枕無眠耳自鳴劫火不虞逃厄運浮漚亦復任殘生

說與稗官應末減堂厨初未識魚羹

簡齋謂此
書生便宜

端能何地脫塵寰萬壑松風夢寐間無限三槐仍九棘

孰知東國與西山聲名赫奕終非福滋味悠長莫若閒
馬足車輪不到處陶門惟有畫常關

送程侍御

文海

二首

乘傳來江表觀風遍斗南年豐仍物貴民瘠為官貪
浩良難測元元恐弗堪二星奏天陛勿謂此常談

大門賢叔父共載曲江春談笑今如夢東南有此人竹
林猶小阮蓮社已遺民老死看公等烟霄要路津

贈鮮于伯幾

樞

聞名今子駿所至見公詩數步元非遠相看豈可遲吟
鞍霜跌後談麈日閒時此客差同味蕭齋許一窺

送趙子昂

孟頫

文賦早知名君今陸士衡真能辨龍鮓未可忘蓴羹刺
喜脩途關深防俗目驚時聞黃耳信緩步取公卿

送劉元鼎

鉉

高密非逢世才堪學掾為稍容請祿米聊復隱書帷要
路終多險清官未覺卑蓴絲春正美早寄鑑湖詩

請平聲

次韻仁近訝約予不至

風塵矯虔稱寡孤，疲忙暴骨紛痕瘡。
驟得如願宮亭湖，鬼妾色悲充爾娛。
老夫旅庖慳薪蔬，爨僕揶揄朝連晡。
疇昔過君觀異書，諄語謂為飢所驅。
前二千石出無驢，徒步亦無傍人扶。
忽往倏還元不拘，休官解縛身自如。
有酒可再折簡呼，索詩即恐技如鼃。
歸與歸與巾柴車，不用祖席歌驪駒。
青山白雲落吾手，春天夢斷章臺柳。

丙戌除夕次韻仁近二首

歲窮猶此客不早見幾微豈易賒鄰醞何慙典故衣餘
寒當有幾小忍未為非野燒迴青潤春山飽薔薇
盆梅開欲盡翠幹已苔深物極容春蟄人窮自陸沈鍾
知浮世事燈識老儒心冶陌饒芳草衰遲肯重尋

除夕再用韻答仁近二首

多公二十歲筋力早衰微棄物猶殘厯童心更美衣春
光終古在人事逐時非但願干戈息無庸詠戍薇

多公二十歲此夕感尤深頗覺北風轉不堪西日沈醉

喧鄰巷語愁動故鄉心
七袞從今始菟裘可緩尋

丁亥元日二首

丙戌元日亦寓杭有柳動梅殘驚歲換兒寒女
瘦望予歸之句春如越秋如睦今猶未能歸有

感賦此

元日如常日閒人更老人後杯真壽酒便服勝朝紳何
物稱三品今朝過六旬候門怜稚子莫放杏梢春

孰不聞鐘起吾猶擁褐眠家人分兩地客邸跨三年果

菰思攜幼染盛憶祀先故山歸去好當及掛燈前

初三日甲子雨次日雪上元方立春

我比絳老今何如甲子三百六十餘雨多晴少幾水旱
往往咎證符占書新正三日甲子雨殘臘未春何所主
通理三白妄自寬明旦寒簷雪寸許耳順已過從心前
平生目擊真可憐兵戈屠斫骨骸挂疾疫瘞埋墟墓連
偶容脫遺鬼錄內貧無人知窘無對至此豈可逢歉歲
夜枕夢驚心欲碎雖然慎勿尤天公邇年米價元不穹

汝自不肯學貪吏攢眉聳肩甘詩窮

哭周子弋二首

緒入燕死
邳徐間

欲極雲霄闊焉辭道路長早知當飯含寧肯尚齋裝瘦
馬嘶荒廡殘書閣故房絕憐聞訃日妻子哭空堂

渡淮才幾日道死近徐州藥有何人進棺於底所求本
期紆紫綬豈料殯黃樓窮者窮如此紛紛燕頤侯

或獻髭藥却之

行路乾坤半流年六十強不營埋骨穴更用染髭方政

使飛昇可猶難服食良養生或攻外曾否鑒嵇康

正月初四後十餘日病嗽不能出雜書十首

僦居背古城樓西聳喬木兩年見黃落雪盡欲再綠往
時春鵲雛理巢乳哺續不歸視吾兒於此捧飢腹窮山
況味等差勝客影獨

獻歲亦未春驟煖似炮烙衣汗欲索扇一變雪霰作頭
岑萬鈞重喉棘痰屢噎旬日不能出如虎坐受縛脫或
死客中何異紇干雀

西鄰幾老革六博喝雉盧倚樓俯長道飲豪語言麓東
鄰乃販子遇夜召朋徒大鼓恣考擊吹彈更歌呼書室
一燈暗笑此寒老儒

客久已無味更苦貧用乏年邁欲不競仍著疾病壓相
望五百年老杜卧夔硤疲瘵困璽絲遐荒敝戈甲誰方
擁傾城樂死有玉柙

夏日客此樓買冰敵炎暎沍寒不買冰輟費用買炭冰
炭役浮生倏忽涼燠換故山饒甘泉落葉足炊爨曷不

歸去來作此瑣屑嘆

有馬可代步無馬徒步行有酒醉亦佳無酒神思清客
樓卧病中日夜唯雨聲此病尚可起當如雨復晴氣盡
死期至豈容強求生

炯炯君子心至死能忍貧炎炎小人膽為利寧殺身我
年三紀後登朝忤權臣逮逾四五紀破家蒙戰塵縱不
當君子終當非小人

近代一人耳吾鄉老朱先甲子如我今猶活十許年漳

州復潭州說經入從班無何黨禍作委順不怨天餘生

幾明日小子其勉旃

晦菴紹熙元年庚戌六十一歲後為漳州潭州及入侍經筵六十五

矣慶元遭學黨之禍七十一卒以隆興乾道淳熙之盛際二十八年間不能一立朝始終避遠近習甲寅內禪事未可知也七日而召不兩月而至乃厄於侂冑而無所復伸出處之際豈非天哉朱先者謂朱先生也本漢

書例

無一日不醉未嘗見有疾三日偶無酒咄咄怪病出肺壅鼻垂涕不飲踰十日醉死政自佳性命安足惜奈何官價貴典衣買灰汁

江皋殘雪霽想見東風還可覽不可拾春容有無間城
市闌燈火強作元夕天亂離痛甫定物華非自然栖栖
坐羈旅嘿嘿悲徂年

夜寒

夜寒眠不著吾道竟何如世事良多故身謀似太疎醉
從添酒債病始愛醫書雪霽尋僧去誰家借蹇驢

上元立春

華燈綵勝兩逢迎美景良辰未易并花信風初迴肅殺

柳梢月豈異承平神黿觀闕山何在旅鴈汀洲水復生
可待紫姑問休咎買牛西崦課兒耕

題郭熙雪晴松石平遠圖為張季野作是日同讀

杜詩

書貴瘦硬少陵語豈止評書端為詩五百年間會此意
畫師汾陽老阿熙鬼詩瑣畫世一軌肉腴骨弱精神癡
明窻共讀杜集竟兩幅雪霽義橫披前幅長松何所似
鐵幹皴澁撐霜皮其下怪石卧狡兕突兀嶮崿凝冰嘶

後幅漸遠漸迤邐一往不知其幾里目力已盡勢未盡
平者是沙流者水人物如指或如蟻戴笠騎驢者誰子
顧此定是覓句翁羸僕縮首襍凍耳欲渡未渡溪坂間
啐野寒鳥忽驚起自非布置奪鬼神焉能揮掃到骨髓
郭生此畫出自古心胸亦如工部百世詩中龍清癯勁
峭謝嫵媚略無一點霑春風市門丹青紛俗工為人塗
抹杏花紅老夫神交此石與此松留眼雪天送飛鴻

次韻仁近客興二首

閱世紛如起滅漚可須金羽較沈浮自知人老宜堅坐
更為春寒倦薄游羌蹇尚能哦楚些儀鄰不復夢唐樓
載書歸老黃山下待喚溪翁賃半舟

華年君欲隱山村如我彌當杜筭門落落筋骸餘老病
奄奄氣息僅生存黃精滿谷春苗嫩丹朮藏山石溜溫
足可無求度殘歲自編詩集教兒孫

寄伯宣尚書士常吏侍二首

林下休官已七年新聞偶到白雲邊一時人物歸司命

二老儒臣筦吏銓嚴子釣臺踰舊隱山公啟事玷羣賢

聞二公以回保舉驅馳力盡心徒在聊信歸鴻寄短篇

貧與身仇病作魔春來為況復如何梅花未了桃花動
詩債猶稀酒債多剩喜故人躋要路稍令閒客藉餘波
吏廉歲稔兵氛寢是處江湖可一蓑

靈隱寺行呈伏虎巖

蓬萊水淺塵幾揚厯劫不動此道場黃金何年佛氏土
白雲自古仙人鄉吾故不能知鴻荒嘗聞許由避陶唐

南巡會稽憶夏后西渡浙水傳秦皇欲鑄文字示萬世
想曾摩挲崖蘚蒼君臣豈不亦一到父老失記書傳亡
思萬人歸亂聽勒衣錦軍起誅宏昌教士四萬虜吳友
子弟八千從項梁鋒攢鎬飛沸如湯冷泉之冷常冰霜
風濤洶地保恬靜火雲爇天饒清涼寺門奇石萬鬼鑿
霹靂穿洞龍騰驤偃如未射李廣虎突如乍叱初平羊
漫山鉅竹不知數百圍竝立松杉樟野猿攫菓就人手
山客貿薪充日糧艷浮凡俗花卉絕毒螫獐惡蟲勇藏

竺峯飛來夜著翅
桂子墮落秋飄香
覩史陀宮足髣髴
摩羅耶山非渺茫
色究竟界掃蜃氣
給孤獨園堪雁行
遊屐屢破壁
疥落優波度
籌千萬
強老樹一株卧
礪上
向來未有如許長
有能直上北高塔
一覽弱水窮扶桑
織女機邊拂衫袖
老人星外來帆檣
金碧殿閣鍾魚廊
飽饘臚衲叢蜂房
毗盧遮那明正徧
散脂脩摩森護防
長明燈籠照十方
胸中亦復作是光
纖蠅么蚋不到處
三千大千禪那床
游戲伽陀祇夜章
豈無一人駱賓王

摩訶師子今僧王一奮迅失千狐狼

仇仁近母邢夫人挽詩

慈顏才一識近獲拜書樓忽化金棺火應添石室籌鄉鄰傳閭範弔祭盡儒流令子今和靖詩名甲此州

閏二月十六日清明

日日樓頭柳色濃年年為客負春風鶯花時節兵還動詩酒生涯老更窮逆料未來猶有幾懸知所過即成空故鄉寒食澆松處亦想兒曹念乃翁

春思

枯樹重看發刺桐似聞陌上已殘紅
多端世故干戈後
大好春光老病中
萬戶獨難侯李廣
兩生寧肯聖孫通
畫樓著燕朱簾捲
別有冥冥物外鴻

戲書

春天晴更好無奈惡情懷
馬死鞍空在
花開酒欠佳
鄰醫賒藥餌
侍婢典簪釵
倚杖吟還喜
新分孔墓楷

鮮于伯幾

分惠

送

原闕一字

景文長興丞

晞文

太湖之岸環

原闕一字

縣君所佐縣為最雄其民無不挾利

刃往往殺人白晝中荻浦鹽丁更擄惡輕舫出沒洪濤
風邇來清霜凍天地一掃蚊蟲銷昏霧承平難治亂後
易況今官制權任同監尹丞簿設四職圜坐決事皆宰
公三可一否或二否掀按擲硯紛相攻北人欺南恃氣
力但亦頗畏明與聰君才如此彼定服豈敢專輒關節
通弊根安在在俸薄所至貪吏如蝗蝻上征下取至民

極何異大蟲食小蟲百姓把盞長官受餽牲器幣廢字
充自古書傳未之見具人眉目心軀熊甚至唯恐盜不
作誣謂叛逆興兵戎村落讎殺小鬪閱一室作過千室
空君昔在平鳶肩翁斗酒濯足游新豐略與常何草封
事便應入侍丹墀楓昌黎調笑崔藍田哦二松間何匆
匆敕君就此豈不屈徑欲一往甦疲癯僚友二三戶七
萬照以胸次百鍊銅升堂熙怡一署字鼓舞父老歌兒
童書畫船過水晶宮楊柳正綠花正紅且為老夫寄詩

筒

全州呂農簿

沅

挽詩三首

誰實柄咸淳無君欲不臣舉朝皆諂子此老獨全人去
國焚頻嗾居村虎自馴傷心諸狎客容易竟亡陳

公田怨已盈關幣出尤輕稍欲輸忠款初非賣直聲二
千垂郡祿五百存臺評舊日朝天路端門野草生

先公與進時早誦小坡詩晚節遭多難耆年對耄期家
貧從俗笑國破任身危後死元非福前途未可知

故太學徐君

應鑣

哀辭

併序

丙子二月二十八日迫太學生上道北行有日
經德齋徐君應鑣字巨翁三衢人為文祭告土
神攜三子登樓縱火自焚不克乃自沈公厨之
井長男琦二十一次男崧十一女元娘九歲同
溺死後十年丙戌三山劉汝鈞君鼎連文鳳伯
正率同舍舉四喪焚而葬於南山棲雲蘭若之
原私謚曰正節先生

蹈海沈江合比蹤子陽蛙坎可能容自聞門外韓擒虎
豈乏雲間陸士龍信矣百年誰不死哀哉三子亦相從
爛為井底泥無恨肯顧區區馬鬣封

家書

倚樓閒看雨已下又重登困入春深劇愁逢日暮增家
書聞子病時事說兵興流汗才揮扇風寒忽似冰

晚春

典盡寒衣未覺貧獨留破硯伴頑身不堪苦雨思晴日

肯為殘花怨晚春驅逐憂愁如有道脫逃老死可無人
懸知興壞皆常理且喜朱櫻又食新

次韻鄧善之論詩

文原

未極皮毛落端難
舌傳夔音諧
祝敵岐脈按
鉤絃舉
日常如見關心或不眠
江湖無正色
齟齬亦嫣然

春盡

時時屈指春餘幾
日日攢眉雨不晴
邂逅三年為此客
蹉跎一事竟何成
牡丹花過勞鄉夢
石首魚來聽市聲

自古忍窮盡豪傑囊無挑藥未須驚

讀素問十六首

晝夜雨不止旬餘復旬餘垢衣褻弊絮念已朱夏初逆
旅何可處出門但泥塗屬時乏美酒積悶無由除翻閱
故篋中偶得黃帝書維昔世未季曰土牧田駒五運今
未測飄驟將焉如大谷十二俞音庶孰砭斯民瘡砭針也古以石

為針

真人古不死變形能登天聖人乃其亞在宥亦長年堯

舜壽踰百猶若脂腊然後世妄庸子多慾求神仙

上古儼貸季色脈通神明人處禽獸間於物澹無情針

石有不用祝由足移精世降尚毒藥一誤百禍生

祝由者王

水謂祝說病由而已周官音咒或音注謂傳藥非是上古未有也酒醪湯液猶備而不用

煌煌金蘭室歷歷玉版文伏羲之所為傳逮軒轅君妙

測天人際豈徒針藥云予實有左癖此豈非三墳

素問雖醫書讀之患不精大可用人國小亦可用兵行

所勝不勝逆從決死生勿待陰陽間關格不相營

反治非反治繆刺豈繆刺不同將無同不異所以異寒熱故殊途左右肯易位聖賢善用權初不失經意

婁人冒殺氣感寒多兩傷貴者不其然所患由高粱美石能發瘕芳草能發狂喜怒不中節邂逅身亦亡

高粱即膏

梁

方隅各有四明堂朝八風聖人以治世不受外邪攻方士祠太一貴神分九宮禍福初不驗徒用欺盲聾

病人有穀氣面黃無不瘳黃不欲太明如縞裹括樓相

工撫緒餘喜色占眉頭得非許負術亦從岐伯求

嘗富後乃貧其病名失精嘗貴後忽賤病又名脫營區
區得喪間性命繫死生不有窮愁者著書如虞卿

故貴或脫勢封君有敗傷良醫所不治其人神已亡秦
漢以至今此事紛披猖失侯可種瓜奈何失國王

凡火以水沃無不立銷滅龍火行雨中沃水乃愈烈甚
者則從之不以寒治熱後主先所因神聖有秘訣

三陰與三陽應天之六氣五行加相火於地分六位義

畫箕子疇恐亦出此意漢儒灾異學可擇但勿泥

用針取工巧用藥稱聖神伯高不盡言極藝未易臻針
法今鮮傳甚於藥殺人與落庸醫手寡欲全其身

鬼臾區所陳太始天元冊後世言陰陽胥於此焉出九
星首天蓬遁甲云古術要是秦漢間良醫所祖述

三品別貴賤四制定奇偶主病則用之上藥或弗取得
士寒暄可量才世胄否否苓雞壺言吾亦聞莊叟

辨淵明詩

淵明讀山海經詩精衛銜微木將以填滄海形
天無千歲猛志故常在此四句皆以指精衛也
謂此禽之壽焉有千年而報寃之意未嘗泯耳
若所謂形天獸名口中好銜干戚而舞者山海
經信有之曾紘偶見此即改形天無千歲為刑
天舞干戚然辭意不相諧合蓋近世讀書校讎
者好奇之過也予謂形天無千歲為是不當輕
改

微禽移木石欲以塞東洋賦壽何能遠銜冤未始忘起
脾訛越婢澎浪轉彭郎輕改刑天字於文恐未詳

苦雨

擬勒移文問雨龍麥秋忍不念吾農黃雲萬頃成泥爛
偏與閒簷活瓦松

蠨蛸

牕眼蠨蛸粟許微早能結網伺蟲飛都來口腹容多少
狼虎操心伏殺機

謝張師道廣文見過二首

伯淳

曩讀登科記高標我已驚
名如程子字字是後山名可
但於詩妙終當以道鳴
將無嫌落殖亦許定交盟

爽氣橫空闊清談絕輩流
嘶驄能枉顧漫刺肯輕投
敢謂官無冷其如學更優
榮途未須捷恐隔舊交遊

題朱仲華百牛圖

玉

以棟梁成厦屋萬牛不足以耒耜
命中車一牛有餘畫
師幻此沮洳澤若牯犢
輩且百太平村落豐年秋只

欠耳邊聞晚笛老身元是牧牛兒憑誰寫作劉凝之

約端午到家復不果賦吳體

畧無一點南來風日日褰裳泥雨中端午到家復失約
良辰闕酒非真窮世情故宜俗眼白時事不改戎葵紅
三年為客可歸矣亦念兒曹思乃翁

丁亥生日紀事五首

千世謀生百念捐窮空肯復受人憐九還未悟長生訣
七袞初開本命年寡慾自來甘淡薄忘機時或放狂顛

歸丹已辦齋糧絕猶欲經營買鶴錢

山路訪僧規已定曉樓聞雨事還非今年生日無人識
幾度兒曹望我歸清茗半甌浮雪乳古香一劑炷烟霏
割牲醢酒貧難辦只待天晴浣蟲衣

我生之日憶我父痛甚少游眠古藤忍見金湯今墮甌
劣容詩禮尚傳燈策名作郡了無益罔利肥家終不能
決定歸歟守先墓種瓜聊得似東陵

先君俊譽早颺馳晚落蠻陬禍事奇六十年前生子日

三千里外憶親時
霍光擅漢人皆恐
侯景歸梁國欲危
埋骨瘴烟抱冤憤
蓬萊水淺定前知

先君生回之年始
哭二親謫臨封之

年在乙酉時遠相
當國李全在邊

杯酒誰歟可共揮
殘年心事轉多違
頗聞銅柱征蠻急

孰念葵丘遏糴非

連日市中絕米麵
欲作湯餅亦無之

典質衣裳今已盡


留連舟楫可無歸
故園堪共吾兒灌
政恐淫霖歲亦饑

重梅驟雨無晴日買
歸舟江許已旬日矣

次韻謝洞霄俞仲園


君玉號竹所
有倚竹吟集

卷舒來卷徹初終物象惟君指呼中夜鶴一聲醒聞寂
晚霞千變繪虛空市朝往事驚陽燄林壑幽居勝閬風
如許高流吾未識半生湖海浪萍蓬



桐江續集卷十二

卷舒來卷徹初終物象惟君指呼中夜鶴一聲醒聞寂
晚霞千變繪虛空市朝往事驚陽燄林壑幽居勝閬風
如許高流吾未識半生湖海浪萍蓬



桐江續集卷十二